

BOSNA I HERCEGOVINA
FEDERACIJA BOSNE I HERCEGOVINE
SPORTSKO RIBOLOVNI SAVEZ BiH
SPORTSKO RIBOLOVNI SAVEZ FBiH
SAVEZ SPORTSKO RIBOLOVNIH DRUŠTAVA ZE-DO KANTONA
UGSR „BISTRO“ ZENICA



STATUT

UDRUŽENJA GRAĐANA SPORTSKIH RIBOLOVACA „BISTRO“ ZENICA

ZENICA, 27.02.2025. GODINE

Na osnovu člana 27. stav 5. i člana 54. stav 1. Zakona o udruženjima i fondacijama (službene novine FBiH broj 45/02) , a u skladu sa članom 26. stav 2 Zakona o udruživanju i fondacijama, te Zakona o slatkovodnom ribarstvu FBiH (Službene novine broj 64/04 od 20.11.2004. godine, Službene novine broj 10/25 od 12.02.2025.godine. Skupština Udruženja sportskih ribolovaca „Bistro“ Zenica na svojoj sjednici održanoj dana 27.02.2025. godine donosi:

S T A T U T

UDRUŽENJA GRAĐANA SPORTSKIH RIBOLOVACA „BISTRO“ ZENICA

I OPŠTE ODREDBE

Član 1.

Ovim Statutom uređuje se:

- naziv, sjedište, ribolovna zona na području ZE-DO kantona na kojem djeluje UGSR "BISTRO" Zenica,
- ciljevi i zadaci, zastupanje i predstavljanje, osnivanje, članstvo u Udruženju, prava i dužnosti članova,
- sticanje, raspolaganje i korištenje ribolovnih voda, ribljeg fonda i sredstava Udruženja,
- organi Udruženja; izbor organa; Skupština i njen djelokrug rada, Upravni odbor i njegov djelokrug rada,
- Nadzorni odbor, Disciplinski sud,
- planovi, programi rada, finansiranje i finansijsko poslovanje,
- ribočuvar, sekretar, stručni poslovi i evidencije, opšta akta,
- prelazne i završne odredbe,
- prestanak rada Udruženja.

Član 2.

UGSR "Bistro" Zenica (u daljem tekstu Udruženje) je obligaciona organizacija.

Udruženje UGSR "Bistro" Zenica, kao zona na području ZE-DO kantona (član 5. Zakona o slatkovodnom ribarstvu FBiH), je Udruženje građana koji se slobodno udružuju radi cjelovitog korištenja, zaštite i unapređivanja ribolovnih voda na području Grad Zenica, u koje spadaju dio vodotoka rijeke Bosne od granice općine Kakanj do granice općine Žepče, uključivo i sljedeće vodotoke:

- 1) lijeve pritoke: dio rijeke Lašve do granice sa općinom Busovača, Kočeva, Vrandučki potok, Orahovički potok, Bistrička rijeka;
- 2) desne pritoke: Dudin potok, Đulanov potok, Klopački potok, Babina rijeka, Gračanička rijeka, Nemilska rijeka, Pepelarska rijeka;
- 3) Objekat Ribogojilište Bistričak.

Član 3.

Udruženje je nevladina, vanstranačka i samostalna organizacija čiji se rad zasniva na odredbama Zakona o slatkovodnom ribarstvu FBiH i Zakona o udruženjima i fondacijama građana FBiH.

II NAZIV, SJEDIŠTE, PEČAT I ZNAK

Član 4.

Naziv: Udruženje građana sportskih ribolovaca "Bistro" Zenica

Skraćeni naziv je: UGSR "Bistro" Zenica

Sjedište Udruženja: Bulevar Kulina bana 32, 72000 Zenica

Tel/Fax: 032/242-212

Pečat i štambilj Udruženja su:

Pečat Udruženja je ovalnog oblika dimenzije 30 mm i sadrži puni naziv Udruženja sa sjedištem.

U sredini pečata je lik ribe.

Štambilj je četvrtastog oblika sa upisanim tekstom UGSR "Bistro" Zenica.

Broj: ____/20__

U Zenici dana: ____/20__

Tel/Fax: _____

Veličina štambilja pravougaonog oblika sa visinom od 40 mm i širinom od 75 mm.

Zastava Udruženja je plave boje. U gornjem dijelu je ispisan puni naziv Udruženja, a ispod njega u sredini zastave se nalazi grb Udruženja. Zastava je sa gornje i donje strane obrubljena zlatno/žutom trakom.

Znak ovog udruženja je grb koji simbolizira grad Zenicu sa rijekom Bosnom. Grb je heraldičnog oblika.

Oznaka grada je sive boje sa zelenom pozadinom planina. U gornjem dijelu je skraćeni naziv UGSR "Bistro", a u podnožju toka rijeke Bosne "Zenica" ispod kojeg je označena godina osnivanja udruženja 1923. godina.

Veličina grba je 100 x 140 mm. U formi grba, Udruženje ima svoju značku koja označava pripadnost građana ovom Udruženju.

ZNAK/GRB UDRUŽENJA

Amblem Udruženja se sastoji od znaka/grba i tekstualnog dijela ispisanog žutom bojom. Izrađen je na plavoj podlozi u obliku štita i omeđen žutim obrubom. U gornjem dijelu je ispisan tekst "Udruženje građana sportskih ribolovaca" i godina osnivanja, a u donjem se nalazi ispis "Bistro" Zenica.



Amblem Udruženja se sastoji od znaka/grba i tekstualnog dijela ispisanog žutom bojom. Izrađen je na plavoj podlozi u obliku štita i omeđen žutim obrubom. U gornjem dijelu je ispisan tekst "Udruženje građana sportskih ribolovaca" i godina osnivanja, a u donjem se nalazi ispis "Bistro" Zenica.



AMBLEM UDRUŽENJA

Član 5.

Udruženje "Bistro" Zenica ima svojstvo pravnog lica i stiče ga upisom u Registar Ministarstva za pravosuđe i upravu Zeničko-dobojskog kantona.

III- ČLANSTVO U UDRUŽENJU

Član 6.

- Članstvo u UGSR "Bistro" je dobrovoljno, a čine ga sportski ribolovci grada Zenice.
- Članom UGSR "Bistro" može postati svaki građanin koji prihvati ovaj Statut i druga opšta akta Udruženja, postupa po njima, plaća članarinu i dozvolu za sportsko-rekreativni ribolov.
- Imaju položen ribolovački ispit u skladu sa Zakonom.
- Članstvo u Udruženju se dokazuje važećom članskom kartom.
- Udruženje vodi registar članova.
- Članovi Udruženja prema uzrastu su kadeti od 7. do navršених 14. godina starosti, juniori od 15. do 18. godina starosti i seniori stariji od 18. godina života do 55. godina, a iznad 55. godina su veterani.

Visinu članarine određuje Federalno ministarstvo poljoprivrede, vodoprivrede i šumarstva svojim Pravilnikom.

Član 7.

- Počasni član Udruženja je lice koje Skupština Udruženja izabere za počasnog člana zbog naročitih zasluga za razvoj Udruženja.
- Počasni član ne mora biti aktivni član Udruženja.
- Počasni član, da bi bio biran u organe Udruženja i da ostvari biračko pravo, mora biti upisan u registar članova u skladu sa članom 6. i 8. ovog Statuta.

IV – PRAVA, DUŽNOSTI I ODGOVORNOSTI ČLANOVA UDRUŽENJA

Član 8.

Prava članova Udruženja su:

- Da biraju organe Udruženja i da u njih budu birani.
- Da ravnopravno sa drugim članovima učestvuju u ostvarivanju ciljeva Udruženja.
- Da preko svojih delegata u organima Udruženja učestvuju u radu i svim aktivnostima Udruženja.
- Da preko organa Udruženja učestvuju u odlučivanju o svim pitanjima rada Udruženja.
- Da daju prijedloge, mišljenja i sugestije.
- Da prate rad Udruženja i pokreću inicijative za rješavanje pitanja od interesa za Udruženje.
- Da budu redovno informisani o radu i rezultatima rada Udruženja.

Obaveze članova Udruženja su:

- Da učestvuju u svim aktivnostima Udruženja i da su aktivni.
- Da se ponašaju u skladu sa kodeksom sportskog ribolovca.
- Da savjesno i odgovorno izvršavaju povjerene poslove i zadatke u vezi sa radom i aktivnostima Udruženja.

Odgovornost članova Udruženja:

- Član Udruženja odgovoran je ako se ponaša i radi suprotno od utvrđenih ciljeva Udruženja.
- Član Udruženja odgovoran je ako svojim aktivnostima radi na štetu Udruženja.
- Član Udruženja odgovoran je ako se prema imovini Udruženja odnosi neodgovorno.

- Član Udruženja odgovoran je ako finansije i imovinu Udruženja koristi u privatne svrhe.
- Članu Udruženja nije dozvoljen javni istup u medijima u kome iznosi stavove u ime Udruženja, osim ako ima pismenu saglasnost predsjednika Skupštine ili predsjednika UO Udruženja.

V - DJELATNOST, CILJEVI I ZADACI UGSR "BISTRO" ZENICA

Član 9.

Djelatnost, ciljevi i zadaci UGSR "Bistro" Zenica su:

- Da okuplja ljubitelje prirode, ribolovnog sporta i ribolovnog turizma, te organizirano djeluje u pravcu unapređenja i zaštite ribljeg fonda i opće zaštite čovjekove okoline.
- Da u duhu sportskog amaterizma kod svojih članova razvija sportsku vještinu, sportsku kulturu, osjećanje solidarnosti i svijesti o potrebi zaštite i unapređenja čovjekove okoline, prioritetno ribljeg fonda, te ukupne flore i faune u rijekama i jezerima.
- Organizuje jedinstven režim ribolova na svojim vodama u skladu sa Zakonom o slatkovodnom ribarstvu FBiH.
- Da kod članova razvija osjećaj za važnost vodotokova i obvezu njihove zaštite, kroz razne akcije, čišćenja i čuvanja.
- Evidentira i nadležnim organima prijavljuje ispuštanje otpadnih voda.
- Organizira kontrole radi sprečavanja krivolova i drugih nezakonitih radnji i postupaka na svom ribolovnom području te sa tim u vezi organizuje i oprema Ribočuvarsku službu u skladu sa odredbama člana 39., 40. i 41. Zakona o slatkovodnom ribarstvu Federacije BiH.
- Evidentira slučajeve eksploatacije pijeska i šljunka i obavještava nadležne organe.
- Organizuje školu sportskog ribolova za djecu i omladinu.
- Organizuje edukaciju, pripremu i sprovođenje polaganja ribičkih ispita shodno članu 22. i 23. Zakona o slatkovodnom ribarstvu FBiH.
- Organizira, razvija i redovno održava sportsko-ribolovna takmičenja u skladu sa kalendarima takmičenja.
- Organizuje malu školu ribolova.
- U skladu sa finansijskim mogućnostima učestvuje na tradicionalnim, kantonalnim, federalnim, državnim i međunarodnim takmičenjima.
- Preko svojih zastupnika u organima i tijelima SRS BiH, SRS FBiH i SSRD ZE-DO kantona i drugim organizacijama učestvuje u ostvarivanju zajedničkih interesa.
- Radi i druge poslove i zadatke iz plana i programa UGSR "Bistro" Zenica.

VI - PREDSTAVLJANJE I ZASTUPANJE

Član 10.

- Udruženje "Bistro" Zenica, u pravnom prometu, predstavlja i zastupa predsjednik Upravnog odbora.
- Predsjednik UO Udruženja za svoj rad odgovara Skupštini UGSR "Bistro" Zenica.
- U slučaju spriječenosti ili odsustva Predsjednika Upravnog odbora, njegovu funkciju obavlja Dopredsjednik Upravnog odbora i predstavlja i zastupa Udruženje u pravnom prometu.
- U odsutnosti Predsjednika i Dopredsjednika Udruženja, Udruženje u pravnom prometu zastupa i predstavlja lice koje pismenim aktom ovlasti Predsjednik UO ili, u slučaju nemogućnosti takvog ovlaštenja, funkciju će obavljati lice koje ovlasti UO Udruženja, o čemu u roku od najviše mjesec dana mora biti obaviještena Skupština Udruženja.

VII - NAČIN, STICANJE, KORIŠTENJE I RASPOLAGANJE SREDSTVIMA

Član 11.

Za pravilno korištenje i unapređivanje ribolovnih voda UGSR "Bistro" Zenica prihod ostvaruje iz sljedećih izvora: Od prikupljenih sredstava za prodane članske karte i dozvole za sportsko-rekreativni ribolov.

- Sponzorstava, donacija, priloga, poklona, vlastitih prihoda Udruženja i na druge načine u skladu sa Zakonom.
- Iz Budžeta Grada Zenice i ZE-DO kantona.

Član 12.

- Udruženje "Bistro" Zenica ostvarene prihode koristi za finansiranje ciljeva i zadataka koji su utvrđeni u Finansijskom planu i Programu rada.
- Za svaku isplatu mora postojati Odluka Upravnog odbora.
- Zaprimljena sredstva preko blagajne se uplaćuju na transakcijski račun Udruženja.
- Naloge za isplatu potpisuju Predsjednik ili Potpredsjednik Upravnog odbora.

VIII - ORGANI UGSR „BISTRO“ ZENICA

Član 13.

Organi Udruženja "Bistro" Zenica su:

- Skupština;
- Upravni odbor;
- Nadzorni odbor;
- Disciplinski sud.

Član 14.

Izbor organa UGSR "Bistro" Zenica:

- Organi Udruženja biraju se na Izornoj sjednici Skupštine.
- Mandat delegata u Skupštini traje 4 godine sa mogućnošću jednog reizbora.
- Na sjednicama Izborne Skupštine UGSR "Bistro" Zenica biraju se:
 - o Zastupnici/delegati u Skupštini,
 - o Predsjednik i Potpredsjednik Skupštine,
 - o Članovi Upravnog odbora, članovi Nadzornog odbora i članovi Disciplinskog suda.
- U iznimnim slučajevima, a na prijedlog UO, Skupština može produžiti mandate i nakon isteka drugog mandata, pojedincima u organima Skupštine, prvenstveno radi kontinuiteta u radu organa Udruženja.
 - o U svakom organu može se po ovom osnovu produžiti još jedan mandat do 1/3 članova svakog organa.
- Član Udruženja koji je izabran u organe Udruženja, a podnio je pismenu ostavku u toku aktuelnog mandata na funkciju za koju je izabran, ne može biti ponovo biran u organe Udruženja na narednoj Izornoj sjednici Skupštine, osim ako je razlog ostavke ozbiljno narušeno zdravstveno stanje, porodični problemi i druge okolnosti i razlozi koje Upravni odbor svojom odlukom prihvati kao opravdavajuće.
- Izabrani članovi Skupštine ne mogu biti birani u Upravni odbor Udruženja.

- Izabrani članovi Upravnog odbora ne mogu biti birani u Nadzorni odbor i Disciplinsku komisiju Udruženja.
- Svi navedeni organi se biraju prema Poslovniku o radu Skupštine.

IX - SKUPŠTINA UGSR „ BISTRO“ ZENICA

Član 15.

Skupština Udruženja je najviši organ upravljanja i odlučivanja. Svoja prava i dužnosti vrši u okviru pozitivnih zakonskih propisa u skladu sa Statutom.

Skupštinu čine 30. delegata/zastupnika koji se biraju između članova Udruženja na Izornoj sjednici Skupštine koja se u pravilu održava svake 4. (četiri) godine.

Član 16.

➤ Skupština radi u sjednicama i to:

- Izborna sjednica (održava se svake 4. godine),
 - Redovna Izvještajna sjednica (jednom godišnje),
 - Vanredne sjednice.
- Redovna Izvještajna Skupština održava se u pravilu jednom godišnje.
 - Skupštinu saziva Predsjednik Skupštine.
 - Poziv o održavanju redovne Izvještajne Skupštine mora se uputiti delegatima najmanje 7 (sedam) dana prije datuma njenog održavanja, i to zajedno sa prijedlogom dnevnog reda i materijalima po tačkama dnevnog reda.
 - Vanredna Skupština saziva se po potrebi, kao i u slučaju nepredviđenih teškoća u radu, poremećaja međuljudskih odnosa i drugih okolnosti kada je ugrožen rad ili vitalni interes Udruženja.
 - Vanrednu sjednicu Skupštine, Predsjednik je dužan sazvati i na zahtjev najmanje 20 delegata, kao i na zahtjev Upravnog odbora Udruženja.
 - Vanredna sjednica Skupštine se saziva na temelju pismeno obrazloženog zahtjeva.
 - Skupština Udruženja na izvještajnim i vanrednim sjednicama odlučuje punovažno ako je prisutna nadpolovična većina (16) delegata. Odluke su usvojene ako je za njih glasalo 2/3 prisutnih članova.
 - Na sjednicama Skupštine vodi se zapisnik.
 - Zapisnik sačinjava sekretar Udruženja, a biraju se i dva ovjerivača zapisnika.

Način rada Skupštine pobliže se utvrđuje Poslovníkom o radu Skupštine.

X - NADLEŽNOST SKUPŠTINE UGSR "BISTRO" ZENICA

Član 17.

Skupština Udruženja:

- Usvaja Poslovnik o radu Skupštine.
- Usvaja Statut i odlučuje o njegovim izmjenama i dopunama.
- Razmatra i usvaja Izvještaj o radu i finansijski izvještaj (završni račun) Udruženja.
- Donosi, razmatra i usvaja Program i Plan rada i finansijski plan Udruženja.
- Odlučuje o rasporedu viška prihoda nad rashodima.

- Na Izornoj sjednici bira Predsjednika i Potpredsjednika Skupštine, članove Upravnog odbora, članove Nadzornog odbora i Disciplinskog suda.
- Odlučuje o pohvalama, priznanjima i nagradama.
- U drugom stepenu donosi konačnu odluku o disciplinskoj odgovornosti članova Udruženja, a po odlukama Upravnog odbora.
- Odlučuje o oduzimanju datih priznanja, po odlukama Upravnog odbora.
- Odlučuje o imovini Udruženja.
- Donosi odluku o prestanku rada Udruženja.

XI – SEKRETAR I RIBOČUVAR

Član 18.

➤ Sekretar Udruženja:

- Angažuje se u skladu sa Zakonom o radu FBiH.
- Može biti angažovan i na volonterskoj osnovi.
- Vodi administrativne i stručno-tehničke poslove Udruženja.

➤ Ribočuvar Udruženja:

- Angažuje se u skladu sa Zakonom o radu FBiH i Zakonom o slatkovodnom ribarstvu FBiH.
- Može biti angažovan i na volonterskoj osnovi.
- Radi na poslovima zaštite i unapređenja ribljeg fonda.

Sekretar i Ribočuvar za svoj rad odgovaraju Upravnom odboru Udruženja, a opis njihovih poslova je detaljno opisan u Pravilnicima o radu sekretara i ribočuvara.

XII - UPRAVNI ODBOR UGSR "BISTRO" ZENICA

Član 19.

- Upravni odbor Udruženja je izvršni organ Skupštine i ima 11 članova.
- Članovi Upravnog odbora se biraju na Izornoj sjednici Udruženja.
- Članovi UO ne mogu biti istovremeno i članovi Skupštine.
- Radom Upravnog odbora rukovodi predsjednik.
- Mandat predsjednika, potpredsjednika i članova Upravnog odbora je 4. godine sa mogućnošću jednog reizbora.

Član 20.

- Upravni odbor obezbjeđuje efikasno i uspješno organizovanje i poslovanje Udruženja u skladu sa pozitivnim zakonskim propisima, ovim Statutom, odlukama i zaključcima Skupštine.
- Rad članova Upravnog odbora temelji se na principima lične i kolektivne odgovornosti.

Član 21.

- Sjednice Upravnog odbora zakazuje predsjednik ili potpredsjednik ovog organa.
- Na sjednicama Upravnog odbora se vodi zapisnik, donose odluke i zaključci, te prijedlozi u skladu sa ovlaštenjima iz ovog Statuta i Zakona.
- Upravni odbor punovažno raspravlja i odlučuje ako na sjednici prisustvuje najmanje 6 članova.
- Odluke i zaključci su usvojeni ako za njih glasa 2/3 prisutnih članova.
- Detaljniji opis rada UO sadržan je u poslovniku o radu koji je usklađen sa ovim Statutom.
- Odluke se donose javnim glasanjem.
- Sastanku Upravnog odbora (ako se pismeno najave) mogu prisustvovati i drugi članovi Udruženja, s tim da pravo glasanja imaju samo članovi UO.

Član 22.

- Ako je član Upravnog odbora neaktivan i ne dolazi na zakazane sjednice, a o tome je bio uredno obaviješten, u saglasnosti sa predsjednikom Skupštine, izvršit će se njegov opoziv i kooptiranje novog člana iz reda članova Udruženja.
- Na prvoj sjednici Skupštine, nakon obavljene rasprave po pismenom obrazloženju o razlozima opoziva, odlukom će se verificirati opoziv i izbor novog člana Upravnog odbora.
- Za svoj rad Upravni odbor odgovara Skupštini i Zakonom utvrđenim institucijama.

Član 23.

U nadležnost Upravnog odbora spada:

- Preduzima mjere i aktivnosti radi ostvarivanja ciljeva i zadataka iz plana i programa Udruženja.
- Podstiče i koordinira rad svojih komisija.
- Priprema Izvještaj o radu, Finansijski izvještaj i druge materijale za Skupštinu.
- Skupštini predlaže plan i program rada te prijedlog finansijskog plana za narednu godinu.
- Zaključuje ugovore iz svoje nadležnosti, u granicama ovlaštenja, u skladu sa finansijskim planom.
- Donosi investicione odluke i odluke o zaduženju u granicama finansijskog plana i zaduženja.
- Kada to proceduralna hitnost resornog Ministarstva i drugih relevantnih institucija zahtijeva prema svojim programima podrške nevladinim udruženjima i udruženjima građana, sačinjava i pribavlja potrebnu dokumentaciju, aplicira i donosi odluke koje će biti verifikovane na prvoj narednoj sjednici Skupštine.
- Radi razvoja sportsko-rekreativnog ribolova Upravni odbor posebnu pažnju posvećuje lokacijama “Eko zona Drivuša” i ribolovna staza “Jelina” koja je pristupom prilagođena invalidnim licima.
- Predlaže Skupštini dodjelu priznanja i nagrada posebno zaslužnim članovima i drugim subjektima.
- Predlaže stimulacije zaslužnim članovima Udruženja.
- U prvom stepenu donosi odluku o disciplinskoj odgovornosti članova Udruženja, a po odlukama Disciplinske komisije.
- U prvom stepenu, odlučuje o oduzimanju ranije datih priznanja, a po odlukama Disciplinske komisije.
- Organizira i provodi takmičenja utvrđena programom i kalendarom Udruženja.
- Organizira učešće u takmičenjima sportskih ribolovaca, SSRD ZE-DO kantona, SRS FBiH i SRS BiH.
- Oprema takmičare u više rangiranim takmičenjima i obezbjeđuje potrebna sredstva u skladu sa finansijskim mogućnostima Udruženja.
- Radi i druge poslove iz svoje nadležnosti.

Član 24.

- Upravni odbor donosi svoj Poslovnik o radu, te formira stalne i povremene komisije. Poslovnikom o radu preciznije se određuju nadležnosti pojedinih komisija.

XIII - NADZORNI ODBOR

Član 25.

- Nadzorni odbor nadzire rad svih organa i komisija UGSR "Bistro" Zenica, prati njihov rad, nadzire provođenje statutarne odredbe, odluka, ugovornih i drugih obaveza, trošenje novčanih sredstava, te poduzima i druge aktivnosti iz djelokruga svog rada.

Član 26.

- Nadzorni odbor ima tri člana koje bira Skupština na Izornoj sjednici iz redova članstva. Mandat članova Nadzornog odbora je 4. godine sa mogućnošću jednog reizbora.
- Opoziv Nadzornog odbora vrši Skupština Udruženja.

Član 27.

Nadzorni odbor ima sljedeće nadležnosti:

- Da kontinuirano ili periodično vrši nadzor nad finansijsko-materijalnim poslovanjem Udruženja.
- Da kontroliše namjensko trošenje finansijskih sredstava.
- Da kontroliše da li su ostvareni troškovi pokriveni finansijskim planom i odlukama nadležnih organa.
- Da podnosi izvještaj o izvršenim kontrolama u toku godine i posebno izvještaj o kontroli blagajničkog poslovanja i poslovanja po završnom računu.
- Vršiti i druge poslove i zadatke koji proizilaze iz ovog Statuta i Zakona o finansijsko-materijalnom poslovanju i odlukama i zaključcima Skupštine Udruženja.

XIV - DISCIPLINSKI SUD

Član 28.

Disciplinski sud čine tri člana koji su imenovani na Izornoj sjednici Skupštine.

Član 29.

- Disciplinski sud razmatra zahtjeve Upravnog odbora i Nadzornog odbora, kao i pojedinih podnosioca prijava za pokretanje odgovornosti članova Udruženja, zbog povreda zakona, ovog Statuta i drugih akata organa UGSR "Bistro" Zenica i o tome zauzima stav u skladu sa Pravilnikom o disciplinskoj odgovornosti.
- Raspravlja i odlučuje o žalbama iz svoje nadležnosti.
- Žalbe na odluke Disciplinskog suda u prvostepenom postupku rješava Upravni odbor, a u drugostepenom postupku rješava Skupština Udruženja.

XV- KOMISIJE UPRAVNOG ODBORA

Član 30.

Upravni odbor ima svoje komisije:

- Takmičarska komisija od 3. člana;
- Sudijska komisija od 3. člana;
- Komisija za zaštitu i unapređenje ribljeg fonda od 3. člana;
- Ekološka komisija od 3. člana;
- Komisija za normativna akta od 3. člana;
- Komisija za dodjelu priznanja od 3. člana;
- Kao i druge komisije po potrebi.
- Mandat članova komisije je 4. godine sa pravom još jednog izbora. Pravilnikom o radu komisija će se detaljnije regulisati nadležnosti i obaveze komisija. Komisije imenuje Upravni odbor iz cjelokupnog članstva Udruženja.

XVI - JAVNOST RADA UDRUŽENJA

Član 31.

- Rad Skupštine i njenih tijela, kao i rad Upravnog odbora je javan. Javnost organa i tijela obezbjeđuje se naročito:
 - Javnim održavanjem sjednica;
 - Blagovremenim informisanjem članova putem javnih glasila, FB i Web stranice Udruženja;
 - Stalnom saradnjom sa predstavnicima informisanja i objavljivanjem odluka organa na oglasnoj ploči Udruženja i ostalim javnim glasilima.

XVII - STRUČNI POSLOVI I EVIDENCIJA

Član 32.

- Stručne poslove i evidencije u Udruženju vodi sekretar Udruženja.

Član 33.

- Sekretar ne može biti član Upravnog odbora, Nadzornog odbora, Disciplinskog suda te niti jedne komisije Upravnog odbora ako je izabran prema članu 18. Stav 1. ovog Statuta.
- Zadaci sekretara su:
 - o Realizira provođenje odluka, zaključaka i drugih zadataka koje mu naloži Upravni odbor.

- o Priprema i distribuira materijale koji će se razmatrati na sjednicama Skupštine, Upravnog odbora Udruženja.
- o Vodi zapisnike na sjednicama.
- o Vodi evidencije o blagajni Udruženja.
- o Brine o nabavci, distribuciji, zaduženju i razduženju članskih knjižica, markica i ribolovnih dozvola.
- o Vodi evidencije o novčanim obvezama Udruženja.
- o Komunicira sa Upravnim odborom radi rješavanja tekućih pitanja.
- o Neposredno komunicira sa organima i tijelima Udruženja.
- o Obavlja povjerene mu stručne poslove i vodi potrebne evidencije Udruženja.

Sekretar Udruženja vodi sljedeće evidencije:

- Knjiga protokola – pošte;
- Knjiga zapisnika sa registrima odluka Skupštine i Upravnog odbora;
- Registar sa hronološkim redom brojeva novčanih i transakcijskih računa;
- Knjiga zaduženja članskih karti, markica, ribolovnih dozvola i drugih obrazaca;
- Knjiga inventure i arhive;
- Kao i druge knjige po potrebi.

XVIII - OPŠTA AKTA UGSR „BISTRO“ ZENICA

Član 34.

- UGSR "Bistro" Zenica donosi sljedeća opšta i pojedinačna akta:
 - o Statut;
 - o Pravilnike;
 - o Poslovnike;
 - o Odluke i zaključke;
 - o Planove i programe;
 - o Finansijske planove i programe.

Svaki organ Udruženja donosi opšta i pojedinačna akta prema svojoj nadležnosti utvrđenoj ovim Statutom.

XIX - PRESTANAK RADA UGSR „BISTRO“ ZENICA

Član 35.

- Udruženje prestaje sa radom:
 - Na način utvrđen Zakonom o udruživanju i iz razloga izraženom voljom osnivača.
 - Odluku o prestanku rada donosi Skupština Udruženja.
 - Odluka o prestanku rada obavezno se utvrđuje i razgraničavaju prava i obaveze po osnivačima tj. diobni bilans i obaveze Udruženja.

XX - PRELAZNE I ZAVRŠNE ODREDBE

Član 36.

Tumačenje odredaba Statuta daje Skupština uz pribavljeno mišljenje Upravnog odbora.

Član 37.

Statut i njegove odredbe stupaju na snagu danom donošenja i usvajanja na Skupštini, a primjenjivat će se od dana upisa u registar Ministarstva za pravosuđe i uprave ZE-DO kantona.

Član 38.

Udruženje je dužno u roku od 6. mjeseci normativna akta donijeti i uskladiti sa odredbama Statuta.

Član 39.

Sve što nije regulisano ovim Statutom na snazi su odredbe Zakona o udruženjima i fondacijama, Zakona o slatkovodnom ribarstvu FBiH, Zakona o obligacionim odnosima, kao i ostalim Zakonima i zakonskim propisima koji regulišu poslovanje na ribolovnim vodama.

Član 40.

Statut je usvojen ako je za njega glasalo 2/3 prisutnih zastupnika u Skupštini Udruženja. Izmjene i dopune Statuta obavljaju se u potpunosti na identičan način kao i samo donošenje Statuta.

U Zenici, 27.02.2025. godine
Broj: 15-03/25

UGSR "BISTRO" ZENICA

PREDSJEDNIK SKUPŠTINE
Fadil Hodžić